

明  
詩  
紀  
事

明詩紀事

貴陽陳 田輯

戊籤

華察 二十二首

察字子潛無錫人嘉靖丙戌進士選庶吉士改戶部主事歷兵部郎中復改翰林修撰賜一品服使朝鮮尋罷歸起原官歷侍讀學士掌南院事有嚴居稿八

卷

秦泉集鴻山詩追蹤陶杜卓然大雅  
遵嚴集華君詩洒然自立於塵壙之表意象超越音  
奏淒清若木居草茹服食導鍊淪隱聲迹者之所爲  
言非世人語也  
藝苑卮言華子潛詩如磐石疏林清溪短棹雖在秋  
冬之際不廢楓橘

龔用卿雲岡稿華子嚴居稿沖淡閒曠如秋水芙蓉  
不事雕飾步驟陶韋而得其自在  
明詩選陳臥子曰子潛清儉似茅茨下人  
田按子潛出使朝鮮有皇華集詩不足存惟嚴居一  
稿五言取勝有柴桑遺韻以此知存詩不在多也

### 懷閔宮諭

伊昔託明義盍簪從北扉久要重南金歲晚期同歸如何鑠  
眾口中路忽分違鄙夫昧出處達士能先幾養疴識遵晦戒  
龍知防微嵯峨道場山白雲朝夕飛室遠人自邇莫使音塵  
稀

### 過煙水莊

垂楊陰平田湖畔多菑畬茫茫煙水中結茆成隱居閒門閉  
白日密竹臨清渠行隨溪上雲倦枕牀頭書客至時命酒興

來兼捕魚願言託幽迹卒歲同樵漁

晚晴泛舟

載酒隨輕流演漾情未已夕陽映前川棹入微茫裏散髮弄  
煙波竊比鴟夷子沙際暝色來歸楫還自理何處滄浪歌因  
之一洗耳

送俞汝成遷紹興貳守

一官謫南楚三載始得遷積薪豈足歎養晦有固然揭來佐  
會稽境中秀山川八月錢塘潮送君江上船解宇倚絕巘蒼  
翠生檐前嵯峨越王臺日夕空雲煙臥治饒化理登臨富詩  
篇吾將探禹穴藉此東道賢

澄觀樓隱坐和僅初韻

曉色澄秋林霞明映山翠貪奇事夙興爽氣醒殘醉空霜日  
夜繁坐見木葉瘁天高宿霧收白雲出平地初日照重巖寒  
流響虛隧景物清心魂泠然起遐致

雨後山園卽事和僅初韻

山色曉微霽山鳩鳴不已雨氣積重林巖陰木生耳荷鋤歷  
中園閒畦看新水翠峰對草堂白雲滿窗几因茲避世心悟  
彼攝生理萬物皆自然至人貴無已

過環谷草堂

采藥到仙家白雲滿空谷羣峰環四面蒼翠常在目一徑何  
透迤邐垣見修竹岩扉白日扃隱几睡方熟有時學灌畦抱  
甕蔭喬木悠悠林壑間俯仰聊自足

姚山人茶夢閣

山人恥獨醒，啜茗亦自醉。清風敞高閣，隱几頽然睡。平生  
苦吟冥，想入寤寐殷。勤夢裏言款，曲詩中事神超。萬象融意  
愜，情景備松陰。泣山鬼，夜靜猿鳥避。天籟本希聲，笙蹕一何  
贅。悠悠池草心，千秋可同致。

早春園居次僅初韻

樗散任吾真，幡然早乞身。不辭爲圃陋，聊給罷官貧。荷鋤初  
經雨，開畦正及春。猶憐聞道晚，應媿漢陰人。

寄尤郡博

遙聞授經處，正對錢塘門。白鳥出還沒，青山朝復昏。家貧常  
自足，官拙詎須論。爲問相如賦，何年達帝閭。

送施子羽謁選北上

把酒那能別江城落木初鄉心繁客路寒色上征車旅食途  
將暮人情交易疏漢廷方重賦誰爲薦相如

巖屋

鑿坏宛成室偃側嵌危岡花發洞門隱雲生石几涼隔巖通  
水氣幽隙引晨光豈是逃禪處塵心已坐忘

秋日閒居漫興和僅初韻

高齋著書暇雲盡見諸峰已卜青山宅言追處士蹤溪深度  
夕鳥地靜聞疏鐘蓬戶無人到蒼苔一徑封

芝谿詩爲蔣上舍作

自居鑾江上迢遞憶吳關棲鳥尋故處歸雲懷舊山春明紫

芝秀月照清谿閒孰謂川途遠神遊時往還

送談同年轉台郡二守

浮雲本無繫去住欲何爲山郡興自僻大夫官不卑俸錢足  
酤酒暇日但吟詩莫入天台去花深失路歧

酌紅梅下和姚山人韻

巖梅發紅萼獨樹明高林春晝鳥鳴寂雪晴山閣陰鄉愁不  
入夢歲序自驚心對此生華髮甯辭杯酒深

秋初雨後同姚山人山行

空山秋雨霽載酒一從君林靜發清磬潭虛生白雲登臨聊  
適意去住自爲羣歸路溪橋晚涼蟬噪夕曛

荆溪曉發



挂席出溪口微茫天漸明殘星帶高樹春水抱孤城野曠月初沒村深雞亂鳴停舟問漁父誰識濟川情

山中和文晝承韻

林色晚來淨秋聲雨後新偶然松下坐對此山中人流水任去住白雲忘主賓安能向城市終日勞吾形

送安郡倅還京口

離亭一悵望春水渺孤舟黃鳥啼津樹青山對驛樓恨添芳草色夢繞大江流爲問衡陽雁何時過潤州

冬日送周上舍歸婁江

歲晏東書去悠然返故園爲文已自信生事復何言落葉藏深徑疏梅帶遠村離情不可極寒日下荒原

贈彭孔加

聞說幽溪處衡門委巷通  
榮存三徑僻道在一經窮  
霜葉墮虛牖雲山隨短舫  
坐憐華髮改莫遣綠樽空

楊巍 三十二首

巍字伯謙海豐人嘉靖丁未進士除武進知縣擢兵  
科給事中出爲山西僉事歷參議副使擢右僉都御  
史巡撫宣府改陝西進右副都御史移撫山西入爲  
兵部侍郎改吏部以終養歸起南戶部尙書召爲工  
部尙書改戶部進吏部尙書加太子太保贈少保有  
夢山存家詩稿八卷

四庫總目巍中歲學詩與唐高適相類而天分超卓自  
然拔俗故能不染埃壘獨發清音

海岳靈秀集夢山詩不事雕繪旨趣天成  
鄒觀光孚如集楊公詩高曠玄遠冲夷澹泊河朔魏  
允中擊節誦公晉中詩燈前梳白髮馬上夢青山思  
沈而致遠非唐人不能道  
分甘餘話吾郡楊太宰夢山五言冲古淡泊在高子  
業華子潛季孟問如遠道令人愁况近單于壘秋風  
入雁門羽書日三至微微霽景流天驪色俱素鄉心  
生塞草世事入秋風風雨樓煩國關山李牧祠閒將  
流水引夢與古人居雨響殘秋地城分不夜天古石  
苔生徧泉香驕過餘皆通古作  
靜志居詩話讀夢山詩如水仙十莖江梅一萼嫣然  
薄冰殘雪之外  
田按夢山集五律最勝直擅右丞文房勝境餘子不  
足道也自書存稿後乃謂得於曹紀山呂時臣為多  
雅抱冲襟令人脩然意遠

### 彈琴峽

瑤琴何處聞停車空緬想谷靜水聲幽霜餘山氣朗無聲心  
亦閒况復聞清響大道晦有時靈物豈易賞徘徊坐磐石高

歌動林莽

馬谷山

馬谷近愚谷所以人跡稀昔名烏鴉山不見烏鴉飛惟有紫  
蕨菜其苗高且肥洞口封白雲專待主人歸

述懷

鯤鵬翔萬里鷦鷯在一枝大小各有適進退豈無時胡爲徇  
利祿營營至死悲榮公行帶索陶氏恆苦饑至性苟無累貧  
賤復何辭歸去臥山中斯人豈可師

送黎樂溪憲副轉甘肅太僕

帷幄運籌者翻令在牧芻憂時雙鬢短去路一琴孤已振蘭  
臺紀應蕃沙苑駒誰云閑散地天子欲平胡

柏溪書屋

入夏門長閉爲園道不疏閒將流水引夢與古人居野鶴窺  
丸藥山精聽讀書尋詩自來往風起柳塘初

石州陷後作二首

石州古名郡一日化爲灰虜騎豈飛到關門不戰開腐儒終  
誤國盛世自多材好用廉頗輩空談何補哉

自昔聞兵火傷心在目前生存猶墮淚死去益堪憐城壘酸  
風日干戈積歲年請纓還我輩悔禍是皇天

雁門九日無興登高作詩二首

九塞行將徧三秋歲欲殘故鄉歸未得客抱向誰寬雲迷臺  
山暝風吹關樹寒干戈正擾攘何處可凭欄

把酒不能醉登高奈所思豈堪雲斷處正值雁回時風雨樓  
頭國關山李牧祠寒花無意賞况復鬢毛衰

寓安邑

回首同戈路忽驚歲序徂腐儒慚餽廩多病夢江湖凍水寒  
雲合條山夕照孤荒涼城郭裏惆悵禹王都

過懸空寺

一寺空虛裏危欄高幾層懸崖惟度鳥無路去齋僧雲隱多  
羅樹天垂寶月燈塵心何處覺孤磬下峻嶒

路中逢立春

簫鼓迎春日喧喧客裏聞馬消邊地雪旗煖晉山雲隱隱川  
光動微微柳色分田園正好去莫待有移文

過石嶺關

石嶺月初上登登僕從勞山城秋路遠戍鼓夜聲高驅馬臨重隘感時換二毛風塵頻看劍無夢向江皋

贈車鎮村族叔三老

吾家養齋老所性好清閑薄地不盈頃草房只數間宅鄰廣武墓樹接烏鴉山已往郊原外柴扉長日關

郊居秋興

郊原淨秋色幽事甚從容不厭山僧過每於田父逢爲橋通野水伐木出寒松更願煙塵絕時清一老農

答王龍門見寄韻

自向山中臥蕭條門徑秋市沾愁不醉藥品病多收世事歸

詩卷生涯有釣舟聞君欲相訪家在海西樓

月夜至山園

以我愛光景山園夜亦過微風醒鳥夢明月澹煙蘿露冷蛩聲少亭空樹影多此中得佳句高詠向星河

還家逢九日

芳辰來故國秋色徧柴門正值菊花候新開竹葉尊晴雲高雁驚暮雨長蘭蓀偶誦閒居詠斯人可共論

重過馬谷山村

山村重到日風景益堪親家遠惟宜病境幽豈避人雲開三洞曉水漫九河春投老此中得當年枉問津

送孫司訓之任良鄉學諭



幾載借荒城爲師獨有名那堪驅瘦馬猶自戀諸生月上蘆  
溝白風傳黍谷清莫言官尙冷已得近神京

秋晚桃嶺再集

已過重陽日風高寒更催菊殘猶待客病後尙登臺萬木霜  
中落浮雲天際來祇應拚一醉騎馬夜深回

題趙子冲立稿

嗟君狂者流一第竟悠悠見客少青眼吟詩欲白頭谿山無  
世態花鳥共春愁從此聲名著前身趙倚樓

過響水堡

塞水合流處聲喧十里繁乍聞堪動色相對未能言東峽寇  
歸怒驚濤日月翻祇應阻胡馬不得入中原

早秋登龍門城樓

朔塞樓頻倚，新秋天乍晴。雲山兼日色，鼓角帶邊聲。路有元人轍，臺餘漢將名。楊公石柱在，極目舊開平。

九日大同登高

已作雲中客，更登塞上臺。風塵同老眼，節序託深杯。碧海雁行斷，陰山雨氣來。故園今日菊，惆悵向誰開。

題龍門圖送溫侍御還朝

疊浪下危岑，誰言禹鑿深。羣龍鬪白日，客子發孤吟。怒損山川氣，愁關天地心。憑君爲砥柱，到海萬波沈。

遊大慧寺同李行人熹任計部鎧羅廷評節汪山人淵賦

花垂蘿洞口樹滿碧雲層對境疑爲夢前身恐是僧樓臺依  
北闕經論有南能卻恨相過晚登臨意不勝

宿小山望海寺

岩頭燈火起幾處見僧房蘿薜昏初夜星河滿上方人歸山  
店遠磬入海天長明日正東望蓬萊接混茫

酬紀山見寄韻

別離二十載書到見交情始信山居好益憐詩韻清花開朱  
玉宅雲抱楚王城何處思君切秋高古北平

宿淩雲寺二絕句

繫馬夕陽邊山僧訝客至門開古殿秋云是淩雲寺  
野寺一僧住朔風萬里來虜營猶未徙獵火照邊臺

爲任柏溪題畫

萬壑縈迴一草亭  
溪雲漠漠山青青  
主人何處尋芝朮  
留得松聲與客聽

明詩紀事

貴陽陳田輯

戊籤

皇甫冲

八首

冲字子浚長洲人嘉靖戊子舉人有華陽集六十卷

藝苑卮言太原兄弟俱擅菁華吳中一時之秀海內寡儔

皇甫冲少立集吾兄因是子樂府其劣於古者蓋鮮觀其意直欲極詣以求乎至當而不俯仰於世俗之

談者

司勳集吾兄詩兼綜諸體之妙而不能稱之以一長

盡臻名家之奧而不能擬之以一子此二陸辭藻獨

秀於平原三謝聲華莫先於康樂也樂府雄深古選

雅澹歌行縱逸五言近體典麗絕句清婉差弱者其

七言近體乎

國雅吳中四皇甫盛稱才藻宜嗣冉曾

列朝詩集子浚遊虞山有紀遊詩自爲之序詞致甚

戊籤卷五

美其全集不傳金陵張文寺曰四甫之才子浚爲冠亦闡幽之論也

靜志居詩話四皇甫詩源出中唐兼取材於潘左江鮑清音亮節淨埽垢氛高蘇門華鴻山楊夢山而外

無有及者

明詩別裁吳中詩品自高季迪徐昌穀後應推皇甫兄弟以造詣古澹無一點穢纖之習時二黃三張空存名目耳

田按子浚詩五言與諸弟合轍歌行獨得變風變雅遺意子浚舟中讀楊兵部疏詩云誰讀楊公疏聞之感慨生無從得借劍空使欲沾纓填獄人誰惜投沙已獨清須知直臣志九死一毛輕弔椒山之死義憤勃發乃弟司勳集中壽介谿序謝嚴相公分惠大官攢品謁鈴麓書院嚴公解相還豫章追送淞陵諸詩過於放翁之賦南園在山出山之詠能不於茲三歎

### 築垣行

朝聞築外垣畿甸紛縱橫五城發閭庶九營糾踐更司徒庀餼糧司馬量期程司空度基址板築戒時興繚繞百餘里周

帟遮宸京婦女喜往饁童稚歡呼行予前相勞苦豈不愛此  
役天子守四夷何須問疆場有臣居北門可以謝西域蒙恬  
築長城猶謂秦無策時詘乃舉羸徒爲智者惜父老來告予  
公但見其迹請言前年秋胡馬入塞來兵環順義城馬飲三  
河湄關山豈不隘如涉無人墟壯士豈不猛無敢當其威六  
道召義勇九門宿王師胡虜盡殺人夜火熱民居火焰燒天  
雲白骨盈溝渠醜婦割乳飲美者爲月支素駝滿千萬寸鐵  
貴金珠六鎮坐觀變誰來衛王畿選將盡執袴黠兵非鐵衣  
邊懸本兵首市暴中丞尸元戎閉營卧曾無一矢遺或言召  
之來聲勢相互持虜去竊自慰吾師殺其軀取首作俘馘  
■奏彤墀王民百萬戶乃不如蓬萊思之骨猶寒安知勞與

罷吾將從王事請子且勿嗤回首謂其徒胡虜已刷馬築垣  
戒時成朝夕慎勿惰不記奔逃時吾儕苦顛播若子梁上盤  
若妻馬前裸有弟生不歸有親死棄野東家歎夫鰥西室哭  
婦寡爭門後者死踰河疾者墜舉畚堅下基爲堞高著堞一  
朝壞斯垣誰來顧爾我垣成詠惟甯庶免兵燹禍胡去開門  
行胡來閉門坐臣尹但畫諾將軍幸安妥且侍太乙祠無間  
三邊火

實錄嘉靖三十二年十月辛丑新築京師外城成上  
命正陽門外門名永定崇文外門名左安宣武外門  
名右安大通橋門名廣渠彰義街門名廣甯

順義戰

鄰有順義人告我庚戌事八月月生魄道傳俺達至朝聞古



北屯暮見遼陽騎李生正下帷奮激報守吏守吏不敢言雙  
目但直視馳馬歸赴敵城門忽已閉登城望家室膏血乃塗  
地里閤盡焚燒妻子身首異李生按劍怒眦裂聲色厲詎惜  
中山羹甘心河東棄惜哉無一兵不能爲之計乃有陳使君  
挺身獨不避下令開四門彎弓插兩幟左書報仇文右寫勤  
王字當門據胡床潛軍弛銜轡李生與之俱不覺增勇氣胡  
虜來覘窺一矢兩酋殪胡驚離齒奔倉皇解圍去城邑不破  
殘凡以二子庇功高主不知事往名亦墜李廣豈數奇耿恭  
終棄置斯理自古然況乃居今世請君勿復言此事猶爲細

下邳

天曠川途遙長楊繞墟陌歸舫若飛蓬飄飄挂輕席圯水東

流長邳山暮雲白爲儒四十年哀然一縫掖投筆緬幕中爲  
問山中客儻有墮履人先雞待黃石

七星檜三株猶存

停舟繫石岸躡屩遵瑤壇梁宮暮雨濕蕭檜陰風寒攬衣就  
拂拭詭怪極偉觀形分巨靈擘影屈螭虬蟠上沍煙雲色下  
蝕苔蘚斑何須屬霄漢偃蹇當層軒代禪若反手日月如飛  
翰載記豈所觀圖繪良工難生者宛神理摧者非靈殫緬念  
封殖人千載

過濟甯懷周白川尙書

忽憶尙書思惘然歸舟還過濟陽川棠陰寂寞猶今日楊柳  
依稀似往年江上自吹懷舊笛道傍誰問孝廉船清尊獨對

南城月惟見歸鴉噪晚煙

和子約弟帝京上元

走馬來逢帝里春上元今夜物華新萬家煙火明侵月夾道  
香車暗起塵穠李歌中喧笑簫韶聲裏豔陽人更看天際  
神光起道是西宮祀玉眞

西苑卽事

曉日曛曛照御堤君王身在大庖西雲邊鐘磬和仙樂日下  
旂幢雜綵霓侍從詔看玄鶴舞中官敕賜紫駟嘶長生殿上  
長明火不數秦王祀寶雞

渡淮

去國逢春春復過歸舟四月渡淮河岸當靚處沙成漲水到

迴流漩作渦直北煙塵看遠在向南風氣覺暄多八公叢桂  
今何似欲就山中結薜蘿

皇甫湜 四十九首

湜字子安沖弟嘉靖壬辰進士除工部主事改禮部  
歷員外郎中遷春坊司直謫廣平通判進南刑部主  
事歷員外出爲浙江僉事有少玄集二十六卷外集  
十卷

四庫總目湜詩憲章漢魏取材六朝婉麗之詞綿邈之  
神以駢駕昌穀蘇門固無愧色

甫田集子安雅性閒靖慕立髮先生所爲自號少玄  
子詩沈蔚偉麗早歲規倣初唐旋入魏晉晚益玄造  
鑄詞命意直欲窺曹劉之奧而及之惜乎未見其止  
皇甫沖華陽集仲氏子安謂余曰今之爲文者王宋  
稱一代之宗李何爲中興之冠然王宋反元習之靡  
而不能不病於聲李何矯一時之弊而不能不泥其

迹故於詩獨取迪功子安刻勵二十餘年其性敦靜  
簡默又能致其深沈之思其於詩鑄詞精而爲旨遠  
體骨奇俊辭彩英發吾宗之有子安則衣裳之冠冕  
居室之棟梁矣

司勳集司直兄學臻博極思覃深湛余分則友于義  
同師授每有述造輒相詔視商榷砥獎可得而言方  
其家食舍章與徐生二黃定交筆札篤嗜工部旣何  
李篇出病其谿徑專意建安至解巾登仕與蔡王二  
行人廣搜六代之詩披味耽翫稍同舊好雅許昌穀  
又與王文部李司封唐陳二編修劇談開元天寶之  
盛乃曰詩雖選體亦無使盡闕唐風也故其詩特工  
五言而七言近體薄不經想蓋錯綜魏晉託宿府英  
幽玄以通思春容以御氣婉麗以陳詞和易以達理  
憤懣以抒情綿暢以該事雋永以歸趣其始構也隻  
字不憚於心片言無豔於目踟躕壁窮思擁衾寤索曾  
不少休今稿中或兩字未寬或二語並存致蓋密矣  
藝苑厄言子安之東覽古選頗勝子循之禪棲近體  
爲佳子安卒蔡子木以詩哭之云五字沈吟詩品絕  
一官憔悴世途難可謂實錄又云子安詩如玉盤露  
屑清雅絕人惜輕纖短幅不堪裁翦  
續吳先賢贊皇甫兄弟自相師友焯對策高第爲郎  
尤爲昆季所推貴溪相任宗伯時所上章奏皆草之

或有故使他郎代卽無以當其意改太子司直坐法  
謫又移按察其在越詩曰東覽最盛以五言名  
馮時可元成選集皇甫湜九日詩鵬絃入怨柱蟲響  
切離桐楓落他鄉早尊寒故國秋又河虛平夕霧閣  
掩澹秋塵素霞昇逾靜高雲斂更新又新月詩微暉  
不照綺清漢欲生塵雁山詩遙靄引疏磬羣峰寒暮  
天四傑之概也公負才傲睨曾爲春坊司直卒以纓  
廢然郡中稱其人甚介謂皇甫白眉  
明詩選陳卧子曰少立疑思選調意求雅則惟取境  
不廣無縱橫宕逸之致  
靜志居詩話子安逸藻風飛清文綺合視子循工力  
悉敵銖兩未分宜子後之難爲兄而子約之難爲弟  
也  
明詩別裁子安枕藉選體故五言自高然得風格而  
遺精理未云詣極也  
田按子安刻意摹擬詞俊而格超可謂鍊冰雕瓊心  
手雙絕

### 銅雀妓

離牀棲累榭椒鶴鎖深宮花月常如昔君王不可同綺羅芳

愛盡臺館御遊空惟有西陵樹時時入望中

春朝雪後

拂曙啟荒扉雪照蘭林瑩迴榭眺氛氲層原閱彌亘春動鳥  
數聲晴開煙一徑欲訪垂綸人悠然五湖興

秋夜憶山中

悵茲豐景淪感此流暉馳青霄有翔隼落蕊多寒枝徒對盈  
樽酒美人不共持聊且娛心憂華月泛金池意隨流波結情  
逐孤雲移猿鳴鶴以怨歲暮何遠爲

生朝述懷

修名悵未立悲辰嗟屢邁眺榭感徂川芳華逝不留淒露洒  
皋蘭颯颯天氣秋析析葉去榦翻翻鳥赴傳密雨垂檐駛迴

風繞隙流臨此傷年髮曾是戀恩猷且當投紱去桂樹山之  
幽

歲暮述懷

崇情系淵邱遠迹愧朝闕自于結華綬於今垂素髮風樹歛  
寒泉霜鐘流哀月乘此菽蕭悲彌傷芝蕙歇

雜詩

玄駟適虛轍青旂肅盈軌時暘耀林端餘寒散巖趾乘化皆  
良游登瞰春原美翩翩翔霄鸞矯翰憑雲起思慕遺榮客臆  
襟有如此疇昔慨斯言風塵淹暮齒密親庶來同韓鄩邱園  
裏

和子約弟新霽閒適



中林散微雨開軒眺晚晴山原一綺麗虹日兩輝明長槐交  
戶蔭新渠出水生開襟玩來藻延伫有餘清豈伊西陵獻獨  
得啟予情

往視城南別業同子循弟作

赤嶠倦征軺滄江遂還策調笑掩竹書行吟事泉石芊綿東  
溪樹迤邐南城陌榛蕪獨懷往堂構仍慨昔不見禾黍秋但  
逢麋兔迹沼近伍胥臺市遠梅生宅遙觀經始期歲月殊復  
易焚枯進深酌煙華靄將夕攜手遡歸雲惆悵平津客

春日隱居

二首

從宦蹇無成竭來務田畝悟身一虛幻萬事夫何有昭曠始  
自茲逍遙眎長阜遠墟絕行塵東風搖谷口薜荔靄清川雲

霞生做牖隱几忘吾言嗒焉喪其偶

崇蘭茂北谷鮮藻榮南津摘蘭間雜佩采藻羞嘉賓攜手登  
晴隴舒嘯懷先民潁陽有清波畏壘有清塵朝陽爛五雲光  
照岩壑新且當放歌去聊用全吾真

春日閒賦

驚暉慕屢生淪華懽易失獨往終可期徒然嘆衰疾澤徑茲  
翳茂林園趣非一芳雲起崇朝諸峯乘望出初泉乍交戶新  
花尤映室覽物寧嬰慮幽居親道術邴生游或似尙子願未  
畢寄謝山中人無使淹蕪日

子木見過伏枕彈對述簡

堦草含薄滋庭花罷餘蔭林淨夕迎霜天長朝送雁思君一

水隔歧予三秋眷馳暉杳莫攀歸雲時可見

贈閒上人

東林禪誦地寰中閬靈壤蘿徑罕人蹤泉竹諧幽賞朗公法  
門秀超迹絕煩想皓月窺淨心明霞鑒空象虛薄匪世姿胡  
然久塵鞅領茲析真論永言欣獨往

下西店遊目健眺海渚匯潮環山雲濤華勝

修坂無輟輪孤征寄塵鞅客心忽昭洗巒林納澄瀆蓬萊幾  
清淺靈潮閬何廣伊予一壑觀從知百川長煙黛縹峯華雲  
錦涵濤滉春合滄波深晴搖翠微上茲言采秀行兼值乘桴  
往達生趣旣兼齊物理尤明東方傲旅遊西笑非情賞

雨宿桐巖嶺

朝馳碧澗隈夕到翠微裏揚炬厯危岑披林息廬軌半空霧  
雨交歟壑風泉委清耳不避喧瑩心自爲美秉牘向雲蘿問  
俗攜琴史滄洲非滯洛冥翰尋當理

登雲峯最高頂

稍聞翠微鐘猶自厭城郭復躡丹梯霞所見惟峯壑步趾窺  
蓬瀛舉身向寥廓斜日挂危龕非煙開化閣翔鹿登素雲冥  
苔繡瓊甍執掌懷仙蹤信宿春華落靈區事遙踐海嶠果幽  
諾伊予期會人聿來遊鸞鶴

踰盤嶺觀石門潭

總駕踰盤嶺探奇自茲始禽木非羃翫岑泉愕今擬來觀石  
潭勝乃知巖瀨卹渟泓瑩靈碧錦礫耀蘭渙輕漣不暎雲冷

風緣破起春生滄海外霞散綠蘿裏客心在澄瀾豈但濯纓美

入舟

停策厭霖潦登艫美雲樹輕飆自遠集川色靄已暮澄瀾含霞彩遙洲泛秋素頗協倦遊情殊深隱淪慕從來困弱植拊志慚遠度時會苟難并操持不易固放斥金河居眷戀玉門驚幽桂日夜零悵望江海路邈哉袁生室忝此千載晤

夕泛遣思

開秋兆徂節汨吾旅川陽臨此秋氣悲旅魂蕤洋洋何況隔心賞徘徊眷河梁感別念有緒指途憂無方汀渚屢迴復風濤增慨慷兩鄉日子歧一葦思誰杭微月挂石壁萍草亂寒

塘翳翳雲去岫塗塗露委芳澤水沿北船朱華嬉南檣聊自  
知魚樂江湖永相忘

之崑崙道中書懷

迫歲物務勞念此近郊客趨塗無百里江城望來隔二年謝  
旅遊登艫慢疇昔既感道路艱復嘆時序易川葦夾岸鳴湍  
浪乘風逆微微散林旭泛泛隨波翻眷言濁酒尊誰遣他鄉  
夕予方畏簡書春陽事行役

湖泛

我行踰孟冬風湍日云滯聿來沂淮甸還途指江裔暮靄散  
長蕪遊目盡湖勢蒼茫寒葭外浩瀼白雲際棲鳥去人煙驚  
鳬下漁樵行行忽超遠望望更前詣天色隱鴻蒙湖湍失空

齊客念坐纏綿臨泛怕無繫適國情已違歸田事仍戾永言  
期滄洲拂衣自茲逝

桐巖曉發

厲澗越南岑拂霧趨東土宿處惟蒼煙遙天徑如縷林光曙  
鳥散海氣寒雲聚憫勞感婦歎搖搖涉春雨

發郡城之天台道中述所經覽寄孔謝二憲副趙何二

僉憲同年

委羽周遐討飛流更幽悰林蘿踐已深巖巒去彌重綠雲迴  
幽溪紫煙蔚奇峯霞摛金潭藻雨濯春山容但聞松泉音不  
見鸞鶴蹤當同羽化客海上期遊從

觀石梁夜宿萬年寺迷遊寄伯氏子循子約三弟周山

人

微生不偶世孤拙恆自將徒欽楚老喻載履越人鄉五辭念  
乖怛一往形瘵傷春山填委暇乘日事遊翔夕棲鸞霞陰旦  
發桐栢陽旣弄石潭月復掇瓊臺芳雙闕轉天徑萬嶺鬱蒼  
蒼鳳侶時髣髴花苔深紫房徘徊送落日上下窺飛梁細懷  
同襟懿暮色含悲涼絕冥良已遂心賞何由忘愁思雲關客  
聞猿清夜長

贈施比部四詠

孤雲正棲峴間月始登嶠綠苔席餘尊金風吐仙調客有綵  
山姿靜聞天聲妙萬壑皆能吟甯假蘇門嘯

峴山鐵笛

山尊不雕飾鴻濛契予情逃樊託深好遊古遺榮名神將餐



讀澹思與對泉清頽然視萬物何啻如流萍

窪尊醉客

連山對澄磯鯉鯉發幽賞緬懷任公釣悠然范生槩花源互  
窈窕雲波彌滉漾試問五陵豪何如雙溪長

茗雪漁長

蘭橈去悠悠碧浪何瀾瀾嘯傲天影中徘徊月明裏望隨蒹  
葭盡興逐鷗鳬起余亦倦塵纓從君問煙水

碧浪蘭舟

### 早春雪後看雨

雪罷清江曙春隨細雨來郊西好風景柳色半樓臺散漫兼  
空淨芳菲觸處催行雲自無意怪得潤莓苔

### 高杜諸君同集

曲徑雲深處幽窗雨過時村墟隨地僻花鳥怨春遲綠酒追  
朋好青山隔夢思開襟對公子高興戀佳期

夏夕雨後命酌同周子伯氏叔氏得頭字

暝陰淨窗竹池上雨初收坐覺寒泉瑩仍憐芳杜幽故人與  
斟酌清夜愛淹留應附三何躡雲門可白頭

集談氏園亭

幽興偕仙步名園集綺辰檀欒題賦客巾拂舞花人落日臨  
池好行雲繞坐新黃昏催秉燭更益畫堂春

昭慶寺翠筠禪房同孔聖憲

城樓隔深竹龍象窺湖隄况復蒼蹊暮聞聞幽鳥嘯情知多  
惠好靈境難招攜惆悵寒山路雲關處處迷

林居晚興

歸來滄海畔非復戀人羣獨樹晚成適疏花寒共芬南山平

大隰西澗靜流雲且對一杯酒誰能迷世氛

卜築

卜築向何處聞吟在澗詩自來迷歲月直是偶心期白鳥分  
磯石寒山共酒卮一行歸逆勺那復有塵羈

錢朱包三子過集賦贈

能賦三君手爭雄綵筆詩風雲難遽料今古一長悲秉燭宵  
仍遣當歌興暫隨並看憔悴者敷藻盡吾師

橫塘晚興

郭外有幽棲閒情沂碧溪湖山相映發鷗鳥日招機霞色浮  
塘上鐘聲過水西歸來一邱壑源路使人迷

湖上作

芳章已被徑初陽  
仍滿津緬懷滄洲趣  
獨往雲蘿春鷗鳥宛  
如故烟霞時復新  
暝延南湖月身意同清眞

洽平寺

風中到香界  
獨往意冷然  
步引花木亂  
坐看洲島連  
一林寄空水  
滿院生雲煙  
正此化心寂  
鐘聲松外傳

修和觀

桃溪隔隱處  
淡淡春波生  
乘日候煙駕  
有時聞鶴鳴  
山來香閣徧  
雲下石床平  
永願啟金鑰  
齋心朝玉清

題朝天宮東麓亭

尋幽歷華苑  
緱嶺忽茲逢  
行引冷風入  
言將青鳥從  
花明石道雨  
春靄雲溪鍾  
數到陸沈客  
如何迷去蹤

吳山人留宿靈谷禪房

松門下迴策，杳靄鐘聲隨。卻望東林路，懷君獨往時。歸禽白  
雲盡，殘日翠微滋。惆悵烟蘿夕，清風不可期。

宿雁山靈巖寺

寥寥到眞境，宿處傍風泉。遙靄引疏磬，羣峯寒暮天。白雲滄  
洲賞，清夜石門禪。卻笑桃源客，空從蕙路旋。

石梁

來尋方廣寺，石壁路中分。合澗飛丹壑，春蘿挂碧雲。苔梯徒  
屢踐，芝客信難羣。不見花前女，空音時復聞。

登弘濟寺閣別謝施侯蔡四省友

高閣橫江出，凌空石道行。朋遊謝城郭，幽意靄山楹。斷壑晴

雲滿長蕪夕鳥平迴波對延伫一遣別離情

將至東昌

前瞻博平郡雲渚蕩清暉晨風一何鴻秋鴻稍欲微今日他鄉酒惡共故人揮獨有空林葉蕭蕭滿岸飛

舟還使風

宵來苦湍浪晨喜逐風行獨此揚帆去遙隨飛鳥征望雲疑岸駛出浦覺船輕卻笑淹留客元知不共情

懷吳客部以容

故人吳季子起草仙臺端蘭省碧雲外瓊枝何日看江衙遠空盡月帶疏煙寒芳歲一爲別夢來秋草殘

同子循初秋雨後懷虎山橋

同君別山寺心每懷滄洲山館對新霽烟虹開遠流空歌碧  
雲暮悵望石梁遊况復西津月蕭蕭此夜秋

皇甫汈三十五首

汈字子循溇弟嘉靖己丑進士除工部主事歷員外  
郎中謫黃州推官召爲南吏部郎中謫開州同知改  
處州遷雲南按察僉事有司勳集六十卷廣應集二

十卷

馮時可兩航雜錄皇甫子循詩名與王元美相累吳  
下能詩者朝子循而夕元美或問其優劣周道甫曰  
子循如齊魯變可至道元美如秦楚強遂稱王  
王世貞弇州史料子循五言律最工七言次之有錢  
劉風調

四友齋叢說近時皇甫百泉解頤新語不但文字藻  
麗而銓品亦精確可爲詩家指南  
詩數皇甫子循以六朝語入中唐調而清空無迹楊

用修以六朝語作初唐調而雕繪滿前故知詩有別才學貴善用  
明詩選宋韓文曰子循望過子安而其實不逮  
靜志居詩話百泉清音藻思五言整於小謝五律隸  
於中唐清真朗潤妙絕時人  
田按子循五律清裁雅調自是一時之俊五古亦是  
富家至模範魏晉銘鑄齊梁於子安稍遜一籌

### 臨高臺

高臺望不極臨竝意何窮茂苑花爲苑吳宮錦作宮管絃虛  
夜月羅綺罷春風獨惜烏嘯處猶聞曲怨中

### 折楊柳

不見隋隄柳長條大道間絲陰流水去滯影逐春妍妬眉銷  
翠黛聽笛損朱顏日暮行人盡思君可重攀

### 擬中婦織流黃



金閨方永夜翠袖理殘機燈花斜落鏡月光低鑒幃寸心共  
絲斷雙淚與梭揮作伴除蛩響驚眠惟雁飛織就當窗素裁  
爲遠道衣從今芳訊達不及早旋歸

空梁落燕泥

金閨春色早玉闌芳信賒人歸翻後燕淚盡每先花戶暗香  
泥積梁低舞影斜不作雙飛去東鄰王謝家

春日遊西山作

吳鄉信云美山水饒嘉麗疊嶽表參差層巒隱虧蔽時惟二  
月芳雨散千門霽蕙畹蕩雲滋蘭皋屏氛翳獨攜邱中琴言  
鼓江上柁結友遵巖阿尋僧指林際仰看衆鳥翔俯悅鯨魚  
逝物理相因依余蹤且留滯

天界寺贈半峰上人

顧省紛俗嬰尋山愜幽趣秋水淨金河寒雲翳珠樹了看花落時莫辨鳥還處休公別來詩江生擬將賦

雨過高座寺

積雨黯花邱綠雲入香界修策振林間疏鐘落峯外康樂誦阿含陳思演清唄欲除常戀牽惟是逃虛快

雪日寄王戶曹湖上官舍

初雪度江城殘雲來省閣覽物嗟歲殫懷人悵居索擇木本同棲傾枝猶異託維舟安可從開尊自成酌

移官越中初返家園奉答伯兄虞山見寄

薄遊逗京邑獨往眷長林始奉越鄉役因愜故山尋曠茲二

載別良晤展斯今誰謂百里間猶自逸微音未結邱中賞先  
枉池上吟睇燕悲稍戢懷荆嘸以深花源迴俗轍蘿逕斷塵  
簪且駐稽東駕雲扉期此心

盛二仲交示廣志賦因贈

江左本多奇盛生稱獨秀速化有性靈棲立謝塵垢披帙十  
行俱擁衾萬言就握手青門東醉心在良覲廣志擬雕蟲纖  
書臻古簡情同呼覓餘興是淩雲後愧匪辨璧資相邀出金  
奏

而懷盛二時在清聽齋中

支齋營八關陶情緬三徑嗟我裘羊徒悞此琴尊興室邇心  
獨遐城嚴迹難并卮言誰與談簡理自相證細雨忽成寒輕

霏坐生暝天風迴海潮秋聲送清聽

郡齋作

雅志懷山棲復得理山郡蒼岫入南極白雲帶西徑雖事簿  
領勞時與烟霞并心曠眺既遐迹沈尋亦近下車芳載徂率  
牒明兩迅仁靜樂有餘拙遲澹無競命藻酬清暉濡毫愧靈  
運

聞郡檄至簡子約

同時參外庭一朝謝朝列鍛羽非難馴所驚峻網設逸足晞  
高驥聊以就羈繼子季廟廊姿爲邦茂時哲及葺宣令猷何  
暮仁來轍承檄懼有愆趨裝悵無悅曾是東山情蒲茲西河  
烈芳歲若電馳隆休亦飄瞥翹首關路長寸心念將別

春日懷子安兄

恭承東省拜悵望北辰遙香寢分宵直花天散早朝吏情春  
更逸詩興日應饒空有雙鳬舄無因渡玉橋

渡衛

問水知臻衛揚帆此渡河清秋常細雨落日更蒼波言采芙  
蓉佩情忘鷗鳥過江干有舟楫歸興獨如何

同陳給事林尙寶遊毘陵胡舍人園

竝是仙舟下因成金谷遊亭開一水曲山隱百花幽繁圃春  
常駐晴尊雨更留那知龍卧意猶繞鳳池頭

親友道余至京口擬登金山餞別值雨不果

雲將孤島翳雨阻一江分竟日嵐猶濕終宵汐並聞遊心飛

浩渺望眼入氤氲莫恨登臨晚晴時是別君

懷楚中舊僚張子時遷東昌尉

牢落同爲郡飄飛最憶君離尊郢門雪歸馬漢城雲道路情  
難極星霜歲易分心如洞庭葉秋晚只紛紛

道中寄憶衲子大林

歲晚東林樹淮南落木同齋虛玄度月江倚惠連風塵初看  
爲累榮名悟是空歸期殊未得持此報休公

送陳子知杭州

東省含香吏南邦佩印臣離心冷城月別路武林春碧水移  
蘭舸青山擁畫輪岳王遺寢在拜手薦江蘋

觀音閣同比部諸君餞別家兄

躋險因慈閣，憑虛託化城。江山一以眺，雲樹總含情。鐘外潮聲盡，尊前花雨輕。迴波去無限，應是旅愁生。

安隱寺

人天卽此路，花雨見空臺。剎盡南朝建，經多西土來。碑荒殘蘚合，僧定野棠開。了悟身如幻，何須訪劫灰。

上巳日同友人集大甯寺得幽字

帝里冠裳集，禪堂禊事修。人天春駐景，花竹暝通幽。香積開芳宴，金河引曲流。誰云王逸少，陳迹獨千秋。

秋夜集李守衙齋

政閒庭每寂，吏散日猶曛。下榻生秋思，傳杯語夜分。暗花微泣露，纖月淨開雲。失路聊相倚，何期御李君。

邯鄲道

邯鄲臨古道車馬此通津  
錦瑟空埋恨緇衣易染塵  
王昌非蕩子趙女是才人  
迸逐漳流盡荒臺蔓草春

白雲山

青山行處盡始覺白雲深  
錫化無僧在鐘鳴有客尋  
花溪遙隱壑蘿徑曲通林  
坐得浮生理悠然忘我心

東溪寺

東溪斜帶郭數里接仙源  
嵐氣迴盤嶺灘聲到石門  
僧閒翠微舍客造白雲軒  
訝可無機事看鷗代晤言

登赤壁

萬古滄江上清秋赤壁開  
浴鳧知舊渚橫鶴見新臺  
妙齒瑜



非昔雄心操已灰  
媿無題賦手猶欲記重來

哭姪阿乘

長魚疲侍疾季琰妙通禪  
毀性安疏節無生得大年  
松邱成異代花徑隔重泉  
一見西河泣誰能不泣然

詠扇

吳繭新傳製齊紈舊得名  
塵來聊障面歌罷尙持情  
學月何曾滿懷風不奈輕  
莫須逢內史價始重稽城

關索嶺

斲石微通路攢峯儼作關  
雲中馬嘶去天上鳥飛還  
水向盤江匯坡從香樹攀  
平生慣履險於此亦摧顏

寄雲谷上人

棲霞信靈境滅迹企前規松覆梁王宇苔荒江總碑鱸歸秋  
興後猿定夜禪時怨別心千里惟應江水知

贈嚴叟

聞有君平隱湖山不易逢溪藏幽處隔雲合曉來峯曉鳥閒  
中興馴鷗物外踪尋君迷九曲花樹一重重

鄱陽

鄱口曉來望潯陽路此通頽波銷霸業蔓草沒王宮霧色香  
爐上秋聲瀑布中禪心與遊思并落楓林東

惠山簡汪沛

閉戶沈冥久尋山感慨生靈泉常淨色空梵亦秋聲花雨行  
間濕松陰坐處清不逢雷處士臨眺獨含情

皇甫湜 九首

湜字子約一字道隆冲弟嘉靖甲辰進士除工部主

事謫河南布政理問遷興化同知有水部集二十卷

司勳集子約詩每山閒曠彌覺冲逸兼好綠華紫清

之章貝集珠林之偈景純振響於仙遊摩詰懷於

禪寂興到斯成曾無造次應酬之語

松韻堂集水部詩清質罕儷其志意亦復立曠故其

文乃爾

黃德水國華集水部詩意玄詞雅律細調清長於造

景務在幽絕山藏水閤披露良多

明詩選宋轅文曰子約盛有才名其詩頗傷浮急

靜志居詩話蔡子木哭子安詩云五字沈吟詩品絕

一官憔悴世途難李于鱗送子循詩云吳下詩名諸

弟少天涯宦迹左遷多子約宦亦不達與諸兄同詩

稍不逮也

田按子約詩步趨晉宋盛唐善於言情讀之令人增

骨肉之重近體微傷局促

王甥至傳家兄信感賦

昔我別都門與子成東西蔓草一爲惜柔楊三綠萸今爾客  
南冠猶沾故國泥再歎浮迹言因傷中道睽爲我說余兄低  
眉曠雲霓能不摧人心喟焉鄉思迷生世苦結束悵邈青山  
蹊

彭澤

重江轉溪綠疊嶂數林滋山色信茲美清風播休時弦歌薄  
從宦景物聊所宜遐想歸來晚何勞束帶爲以子獨往意兼  
此形役悲飛鳥征途外浮雲空我思有情依澤柳結念在江  
離愧彼栖遲者猶懷三徑資

悼子乘

冥冥雨露集熙熙歲始更靈蠢各有化人理獨無生念我泉

下子一絕如朝榮生男以待終胡爲邁天獎清塵布虛室寒  
晦凝軒屏流目無存影涕淚交霑纓悵懷何能已歎息每遺  
聲堂闕曠綦迹詩書空復盈奚但腸九迴心膂成頽崩媿之  
延陵達無乃傷我明

列朝詩集吳中先輩盛稱水部悼子不減安仁悼亡  
能敘悲怨

### 眞州留別華陽兄

河梁意不盡相送到眞州歲月成今別江山是昔遊各言衰  
鬢客那忍故園秋明發東西恨惟看一水流

### 百泉兄同過虎邱如山僧院

春中微雨後卉木散華滋況是東林近偏宜吟卧時水煙間  
鳥下山靄夕雲遲何必招蓮社相攜就遠師

偶過吳江訪子新

一徑翛然卧何如仲蔚廬  
蘿煙棲枕簟湖月入階除  
靜有名山思閒惟老氏書  
平生尊酒意重對夜窗虛

登懷庾樓

一作江陵客長懷庾子山  
林陂美相映雲樹獨來攀  
恩禮湘東舊才名鄴下還  
子規花外語愁思入鄉關

柳枝詞

韶華回首悵離宮  
梁苑隋堤荒草中  
獨有江邊楊柳色  
垂垂還是怨春風

潘岳宅

寂寂閒居弔昔人  
芳臺修閣總遺塵  
洛陽花態渾無數  
空作

荒郊一段春

明詩紀事

貴陽陳 田輯

戊籤

頓銳

二十四首

銳字叔養涿州人正德辛未進士除高潁知縣入爲  
戶部主事改代府右長史有鷗汀長古集二卷前集  
二卷別集二卷續集一卷漁嘯集二卷頓詩一卷  
列朝詩集北人云涿郡有才一石人得其二銳得其  
八  
田按叔養古詩微嫌冗長竹垞所評良然至五律音  
節高亮隊伍鮮明七言律絕亦復翩翩振響在正嘉  
之際不失爲第二流

隴頭流水



隴水清且深東西南北下千里不見人胡兒來飲馬

長安有狹邪行

長安有狹邪馳道相背開宛轉近曲江詰曲臨章臺曲江何  
透迤章臺亦崔嵬越陌植長楊夾路列高槐縈回少城隩盤  
礴新宮隈雕輪結黃霧華轂飛紅埃前載旣已償後車還復  
來要途生坎穽趨競亦愚哉三誦覆車言浩嘆令心哀

蜀道難

孤雲兩角去天咫三峽雙流與鬼鄰翻載覆舟道相屬不開  
一日斷行人

雲居寺

地偏疏過從寺僻慙招尋風雨吟山鬼松杉上水禽壞壇蒼

薜合廢殿白雲深向晚聞煙磬空冷宿客心

虹蘿巖

絕壁臨千尺懸崖結數椽巖虛同梵唄霧重合炊煙僧定猿  
聲上人行鳥道逸談空歸未得留宿愧無緣

巖頭寺宿

山行三十里路過百千峯縹緲巖頭寺微茫天際鐘澗風吹  
短鬢嵐氣濕長松問我今宵宿雲煙定幾重

昭烈樓桑廟

芒碭收雲氣樓桑掩日華廟庭諸帝後簫鼓萬人家龍豈池  
中物雄慚井底蛙西陵銅雀去無樹可棲鴉

逃禪室

書帙經年廢禪因竟日聞地非緣客埽香許對僧焚禿廬空  
談豎清齋佛粥分病來休萬事不是故離羣

### 慈光寺

慈光開淨域沙界出恆河花雨阿蘭若鈴風翠堵波羣山空  
色相一徑入松蘿僧衲翻經字雙林寫貝多

### 潭柘寺

潭柘前唐寺名山碧殿開松高雲影亂竹密雨聲來吸澗龍  
歸鉢銜花鳥集臺數碑勒塵蹟文字半莓苔

### 西禪寺

禪意西來遠空門東里深松蘿開一徑龍象護雙林簇簇曇  
花色泠泠梵磬音片雲間過寺如我本無心

北園書所見

治產無干畝爲園僅數弓  
荒城足寒日古堠易秋風  
佛塔高雲白邊樓晚葉紅  
灌畦甘抱甕轉地罷飄蓬

春日宿長楊寺

長楊隱殘照蘭若暮鐘時  
靜得禪中味閒題壁上詩  
園蔬青雨甲烟柳綠風絲  
一宿聞清梵三生本不期

顯靈宮

星月浮璇闕雲雷結絳宮  
虬軒開顯氣鶴馭下罡風  
道演濠梁叟經傳河上公  
鼎封龍虎伏萬境寂寥中

新春訪成長老方丈

霄漢千尋塔香雲十笏房  
金燈明廣殿瓊幄靜長廊  
花放優

墨色珠舍利光遠公開社地戒行服諸方

山行逸興

葛屨行山徑筇枝度石門鷲峯天外寺蛤嶼水邊村紅葉疏  
林影丹崖挂瀑痕炊煙生碧嶠嶺月閣黃昏

對竹

何處山泉落石灘虛檐十箇瘦琅玕鳳翎搖影三更月鶴膝  
敲風一夏寒深謝年年伴幽獨曾教日日報平安繞園粉籜  
成蒼雪不覺春光過牡丹

贈史子慎

吳興郡守須人英山開飛畫毛骨清道場天目萬峯碧雪水  
蒼溪雙眼明釣艇不驚鷗鳥睡蓮歌那避使君行西湖便訪

林逋宅竹外寒梅瘦影橫

過賈島墓

汨盡窮轅得舊京旋披叢蘚拜先生  
桐鄉遠在今西蜀梓里遙鄰舊北平  
奔走憚消何位業推敲骨瘦是詩名  
太行秋色桑乾水野老相呼後世情

落花

薄晚芳菲盡崇朝錦幃空墮紅無一語應是怨春風

衰草

淺白輕黃逐望迷遠拖秋影上平堤  
王孫尙作天涯客不待春來亦慘悽

正月十七日

燒燈已過春寒減  
巢燕未歸花信遲  
一曲竹枝清瘦盡  
小窗紅雪看梅時

琵琶

墨黑香雲軀不收  
并刀秋水翦橫眸  
春愁浙瀝檀槽淺  
亂點銀冰下急流

石橋村清泉寺

綠遍汀洲水遶村  
碧波橫印小橋痕  
春流到處生芳草  
江北江南人斷魂

齊之鸞

十首

之鸞字瑞卿桐城人  
正德辛未進士  
改庶吉士授刑科給事中  
改吏科謫崇德縣丞  
歷長興知縣遷南刑

部郎中出爲陝西僉事歷河南山東副使擢河南按

察使有蓉川集七卷

盛明百家詩蓉川齊公早負詩名發爲詩歌皆切民瘼國猷筆力遒健曲盡事情

靜志居詩話蓉川入夏諸詩山川險隘誦之有如聚米與尹僉事耕並工惜乎志邊閩者未之採錄也田接蓉川詩有賦張之力超距之勇不屑居於詩流派別而句奇語重可與當時名家各分一席

宣和堡渡河

春漲河初急孤軍待曉天健兒工使馬修岸怯迴船革泛傳  
騎虜魚鳴亂巨川莫憑衣帶水千古塹腥羶

入中衛城

右臂伸西極甯靈近勢聯沙山橫絕塞河水上腴田草木江  
南色旃裘嶺外煙壯心驅倦足乘鄣思翩翩



三山暫駐

金陵望何極此地亦三山苦水愁胡騎高峯倚漢關  
兔深青草窟蛙急黑泥灣土屋無完堵饑人未盡還

遊獻花巖

過雨初憑竹樹涼巖居盡以北爲陽天開斗分山迴拱江東  
關形海混茫星裏小槎浮露電松間清梵引笙簧勝遊無那  
芒鞋劇欲問仙人借鳳凰

張茅坐雨

魃虐蝗妖氣塞空直從霍汝到秦東霑衣晚坐千山兩岸幘  
秋襟萬里風黍穀大稷成野哭豆蔭小穫覲神功憂時未遣  
持杯興白鳥翻飛谷樹中

韋州月夜望螺山有作

缺月秋山顯氣高  
霜清衆繖翠作濤  
溪通澗谷方逢水  
地近鹽硝半不毛  
胡馬幾年空野屋  
王宮萬木俯荒壕  
何當聽續韓公策  
歲省千車轉運勞

過安定堡不入

塞上塵勞久自便  
追風驟裏錦鞍羈  
防秋鼓角孤城裏  
轉粟車箱大道邊  
沙磧蓮蒿青市套  
鹽池潦水碧生煙  
午陰繙綵增寒吹  
似比南靈倍颯然

同姚拙韮憲長張心齋副使盧藍山僉事遊小雁塔

南山秋氣翠巘旼  
野思淒淒碧殿寒  
塔隱佛燈無雁宿  
樹如僧臘有龍蟠  
霓旌古苑悲金盃  
霜節清樽洗玉盤  
十里曲江

遊興盡夕陽風雨幾歸鞍

牛頭山寺

羣山四合鍵青銅約束河流萬古東  
天護漢槎迴鷺嶺地無胡馬飲龍宮  
飯僧歲稔陽坡粟吹客秋高瀚海風  
搔首次寥呼謝眺靈奇屬最月明中

始皇墓

金泉已銅鮑魚枯四海驪山夜送徒  
牧火燎原機械盡祖龍空作萬年圖

李濂

二十六首

濂字川父祥符人正德甲戌進士授河陽知州遷甯波同知擢山西按察僉事有嵩渚集一百卷

四庫總目嵩諸集謙所自訂皆於七子之外自爲一格  
大抵筆鋒踔厲泉湧颯颯而裁翦尙疏不免才多之  
患謙跋石珪熊峯集謂詩文傳世豈貴於多其說良  
是而自定已作乃不能盡翦榛楛信乎割愛之難也  
田按川父作理情賦左舜齊持以示李獻吉獻吉大  
驚訪之吹壘王子衡少石子歌云大梁翩翩李川父  
薛君采梁園歌云大梁李侯才絕妙司馬鄒生爾同  
調其爲名輩推譽如此余檢嵩清集大約近體勝於  
古體七言勝於五言川父尤留心鄉邦故實所著汴  
京遺蹟志二十四卷博綜典洽幾與長安志雍錄抗  
行又撰祥符鄉賢傳八卷祥符文獻志十七卷著述  
繁富不僅以詩歌擅名已也

### 楓林晚照

蕭蕭楓樹林極目水煙積斜陽池口明照此霜華赤佳景不  
負君一尊秋浦夕

### 夜雨

向夕雨不歇一室生蕭爽砌寒絡緯嘶院靜芭蕉響盡酒度

深更齋燈照虛幌兀坐已忘言翛然息諸想

讀孟浩然詩

落魄襄陽客清芬不可攀秋風漢江水斜日鹿門山野寺漫  
留詠松林恆閉關底須淩鮑謝佳句滿人間

邯鄲懷古

邯鄲佳麗地傳是趙王宮廢苑春陰裏孤城返照中叢臺還  
似昔漳水自流東野眺悲無盡棠花黯淡紅

剡中雜興二首

夜雨過漁溪春風入會稽雪舟人不見腸斷剡雲西古廟淩  
霄發深山戴勝嘯多慚許立度恆在石城栖

緯縹傳斯境東南名勝州水迴車騎宅花遶右軍樓樵下晚

峯碧鳥鳴春寺幽何當解簪紱卜築剡溪頭

擬唐人送宮人入道二首

苦憶僊人萼綠華乞身遙入太清家向來寫恨餘紅葉此去  
行蹤有碧霞學道晚依新藥竈洗妝朝棄舊菱花玉笙不作  
昭陽調綵嶺閒吹月影斜

蚤承丹詔入華清卻戴黃冠出漢京簫譜好傳秦弄玉練師  
初拜許飛瓊衣沾別島朝霞色夢斷長門夜雨聲十二層樓  
何處所芙蓉花外是仙城

冬日出南薰門赴吳家屯別業偶值起風悵然作

晨興獨往城南村沙風野霧寒天昏小車驚過大堤曲白酒  
初熟吳家屯弋鴻獵兔暫爲樂故苑遺宮今幾存不見古時

信陵墓朔雲滿地蒿藜繁

梁王臺

梁王臺下春草生梁王臺上春霞明  
兔園積雪有詞賦鳬渚廢榭無歌笙  
百花雙燕且對飲碧海黃塵空復情  
落日爲誰吟思苦千秋城闕暮雲平

僊女臺

在河陽石湖村

僊女瑤宮俯石湖湖光潋灩勝蓬壺  
春風絳節還升降夜月明珠定有無  
流水舊迷秦洞古片雲偏傍楚雲孤  
知從南岳夫人去何日東還海上鳬

百門卽事

百門山前花裊裊三僊洞口雲悠悠  
高車駟馬我何意翠壁

丹崖誰共遊幾家蘿竹背巖郭滿眼煙霞明石樓自憐衰朽  
興不減春日行歌泉水頭

戊寅元日

較較春盤薦蓼芽盈盈杯酌勸椒花青幡綵勝聊時俗雪郡  
江關自歲華萬事傷心愁對酒三年作宦苦思家雲霄未上  
王喬履服食空懷葛令砂

河陽上巳

三月上日何處遊錦韉白馬河之洲忽驚風打楝花盡苦恨  
春隨江水流翩翩拾翠北村女雙雙喚雨東林鳩蘭亭勝事  
久寥落碧草池塘聊唱酬

春日谷園賞梅



谷園梅花春可憐欲開未開香滿筵隔城祇愁西日墜倚檻  
轉惱東風顛攀條嗅蕊忍令折短句深盃能爾妍衆賓醉歸  
主人卧瞑鳥嘯合村墟煙

澤州分司見竹

自別南州見爾稀行臺駐馬暫相依情知水石生秋思肯放  
細塵點客衣深院度颿鳴瑟瑟短牕留月靜輝輝家山亦有  
簣簣宅十畝清陰待我歸

汴州懷古

花石今何在孤城涕淚中金梁橋上月偏照宋遺宮

夷門

俠骨已成塵夷門草自春斜陽騎馬過獨憶抱關人

過金陵寄徐駕部

烏啼板橋浦露落歷陽樹夜聞青山鐘揚帆過江去

春遊

太乙宮前柳色天清寺口鶯啼煖風吹面酒醒斜日穿花路  
迷

閨思

寶鴨香銷盡樓月明初上簾鉤今夕不知何夕仰看織女牽  
牛

登臺有感

臺邊草色苑邊雲載酒來遊白日曛富貴可憐成一夢疏花  
冷雨信陵墳

途中雜識

銅雀臺邊逢早春西陵西去草如茵蛾眉皓齒今安在碧水黃雲愁殺人

明州歌

鮪嶺蛟池空復春越王宮殿已飛塵  
船莫唱明州曲一闋明州愁殺人

寄王倅玘

九華山下讀書樓秋浦寒雲濕不流  
最愛風流王別駕白頭詩思滿滄洲

雲中歌送蔡成之都憲之鎮

黃河北來東勝州桑乾水寒雲朔秋壯士齊歌搜套曲元戎

帶滌紆白骨浩縱橫惋歎不能發總轡歌此章

田按平將軍平安也小字保兒建文元年伐燕安爲先鋒燕王將渡白溝河安伏萬騎邀之戰最力屢挫燕師王親搏戰幾爲安槊所及已而敗被執燕軍歡呼動地爭請殺安王惜其材勇選銳卒衛送北平王卽帝位授安北平都指揮使永樂七年帝巡北京覽章奏見安名謂左右曰平保兒尙在那安聞之自殺東侯此詩感慨激昂仲生固有爲忽死亦其常二句蓋爲安惜之也

### 寒夜懷皇甫世庸

夜色寒以肅北風振高枝況有南飛鴻嘹唳雲間悲思君隔煙水還望情無涯豈無琴尊歡而與誰共之耿耿不能寐起見星河垂願言拾瑤草順風能遠賒

### 宿渡口寺

朝行辭蔚蘿暝宿寄禪室仁屏車馬喧頗遂山林癖閉門謝

幕閑宴坐同隱逸雨洗蓮界青月照松關白夜榻秋聲遠海  
鏡定光碧道心難遽探俗慮暫可滌匪曰參上乘聊以寄空  
寂

亭上

羣動暮已息吾亦與時休暫去簿書勞薄言懷夕遊逶迤步  
畦經逍遙卽林邱涼風洒檐樹亭影漾池流澄神對止水冲  
慮復何求尊中有素醪獨酌還自酬心遠境亦寂何必於滄  
洲

答惟喬夜集

檐雨罷宵響海月升東楹杪秋氣高肅臺館滋虛清長歌命  
深酌豪談對友生眷眷一夕歡悠悠千載情

春日登含元殿故址作

覽故躋崇基披荒撫遺跡川原諒如斯壯麗感非昔五城隱  
見分雙闕岩壑立參差想華構淩厲餘層級卻繞涇渭明俯  
視終南屹落日黯將暮春草萋以碧嗟哉市朝變去矣雄圖  
熄黍離有餘悲桑海詎終極

八月十三夜開福精舍對月

靈境自虛寂秋期倍森爽西風洒樓閣鐘梵虛空響浮雲薄  
暮盡華月東溟上光明麗中天羣昧倏以朗對此悟圓照因  
之釋眾想況有素心人相將共幽賞

期遊蒙谿菴過歸不果途中賦述寄遺道侶

窺壑啟神窟延阜羅仙源富有山水勝彌謝塵土喧芒田時

大藥洞府弭華軒玉桃千載寶珠樹四時蕃  
冲想寄靈閣遐矚阻玄門愴往齒髮變期來  
歲月奔纏綿未能解飛舉詎堪言因書達羽客  
聊以展寒溫

暮春同諸子登望江樓作

襲宦闕茲遊今來邁斯賞朱閣凌漢飛丹磴  
緣雲上芳時豔桃柳春消苗蕪蔣浩浩江水修  
茫茫楚封廣惠風拂綺檻淑氣耀金榜波光蕩  
空洞石霞映虛敞層觀每興矚萬籟各奏響冲  
鶩信有基大造窺無象暫喜辭喧卑同懷納高  
爽寄言御風軒兼以出塵網

秋日過相國熊峯先生故居

圻台願已違奠楹兆何速山立羣不搖川逝  
迴難復生申靈

氣閼化宿餘精鬱烈往寵獨延代遙譽恆馥膺門儼若存拭  
履愴彌篤翟羅張已久容閭式誰續時態傷雨雲義感填陵  
谷

留城懷古

哲士昔未達龍伏於草萊翻然奮鱗翼出際風雲期手握黃  
石符身爲赤帝師智運祕神鬼蕭韓那得知四海歸皇圖英  
雄多見疑開國重始遇乞留有餘機河山奄舊疆珪組紛陸  
離履滿戒知止居崇虛蹈危避穀假高蹤赤松杳何之冥冥  
九霄上飛鴻振羽儀寄謝工弋者懸情一何爲此意商嚴叟  
庶幾達其微

送葛穉方赴河西幕



君乃上谷才遠赴河西幕山中忽相見故舊情如昨神駿本  
爲龍屈蟄今成螻驪騰千里駕且困鹽車縛遙聞主將賢愛  
客時開閣相逢一二語卽訂平生諾日飲葡萄春醉舞蓮花  
鐙歡言魚水契不道殊方惡秋城與爾別霜葉續紛落丈夫  
輕遠遊爲賦從軍樂

秋日曲江同韋西諸君子遊燕

柴門曲江畔榆柳晝陰陰入竹尋幽徑開窗得遠岑野蔬童  
旋摘村酒客同斟坐聽涼蟬響蕭蕭秋滿林

三月三日遊含元殿

芳辰臨上巳廢殿訪前朝地古佳名在時移王氣消河山看  
表裏觀闕想嵒巍春草興亡恨行歌麥秀謠

登毘盧閣

香閣標靈勝丹梯覽壯模人天開化國海岳衛皇都結蓋蓮  
雲涌懸珠寶月孤飄飄辭世網萬有盡空無

野酌

野酌傾崖密山羞薦渚蘭藉雲衣袂溼浮翠酒杯寒醉舞攜  
玄鶴仙謠奏紫鸞臨風思羽翰長嘯振岩巒

石鐘寺

抱郭雲林麗懸嚴樓觀虛窗光挹彭蠡簷翠下匡廬霜吼鯨  
音石風翻貝葉書煙波五湖上到此憶高居

歌風臺

亂水疑無地荒城但有臺風煙沈王氣歌詠想雄才世遠川

原變秋深草木哀登臨招猛士芒碭暮雲來

別館奉餞劉士奇參政湖南

花明翡翠館酒灑鳳凰卮楚塞動行色秦箏起別思雲疑神  
女夢竹想帝妃辭倘著南遊賦因風一寄之

邊事三首

九天行殿丹青麗列鎮雄兵虎豹屯上谷將軍新賜姓晉陽  
妃子獨承恩錦屏歌吹天顏喜玉帳森嚴將令尊流水浮雲  
俱過眼傷心甲第鎖千門

朵顏三衛海西頭保定河間種類稠千里營屯成拱衛百年  
禮樂化旃裘虛傳江統能高論須信文皇有遠謀古北黃花  
俱肘腋瞻天誰抱杞人憂

眉山司馬萬人豪曾築長城心計勞坐使匈奴無右臂笑談  
邊鄙失腥臊黃雲北去龍沙迴黑水東來雉堞高衛霍不須  
論戰伐萬年基業本蕭曹

### 望洪光寺

香臺隱隱蔽層峰曲磴盤盤轉萬松縹緲煙中祇樹色稀微  
花外上方鐘光搖浦殿琉璃淨路入雙林翡翠重渡海何年  
心自許梯雲此日恨無從

### 功德寺

功德寺前湖杳冥渚花汀草流芳馨法堂雲深殷仙梵塔院  
晝寂喧風鈴野煙空濛石閣窺春水蕩漾蓮臺青開門秀色  
淨如洗落日西山虛翠屏

九日同劉司徒慈恩寺登高得嚴字

積雨初晴爽氣嚴  
南山空翠落虛檐  
登高尙覺秋懷壯  
抱病深嗟酒興廉  
白社有緣逢惠遠  
黃花如約遲陶潛  
爲耽佳節忘歸暮  
風帽欹斜醉不嫌

寄馮伯房御史

夏口別君今廿年  
地偏書札迴難傳  
遙聞御史如桓典  
且喜諸生有鄭玄  
老去交情懸楚澤  
秋來離思滿江天  
雨花臺上登臨處  
寄我雲霞賦幾篇

立春夜燕師徵君宅醉中作

西京豪士青春燕  
南國佳人白雪歌  
醉裏不知身老大  
歡來那問夜如何  
纔頭錦段無勞惜  
到手金尊豈覺多  
白髮紅粧

笑相向良宵爲樂肯蹉跎

正月十四日汧邸燈燕遇雪

長安霏雪滿山川帝子張燈令節前  
六出花明流夜月九枝光煖結春煙  
仙偶玉樹調新曲上客瑤華擬鉅篇  
十載王門枚叔老強將衰白侍賓筵

春日遊興慶故池

昔是皇家苑今爲藩國池景龍餘舊號  
花萼尙殘碑風館榛蕪合龍舟歲月移  
藤垂千尺蔓樹拱萬年枝芳草王孫賦  
霓裳帝子辭翠盤懷妙舞玉笛想橫吹  
佳麗前朝迹興亡異代時乘春聊命賞  
覽古一興思海變旋成陸臺傾已就夷  
拔琴歌慷慨徒感雍門悲

題畫

草閣生晝涼南風滌炎暑幽人坐忘言靜聽泉石語

送別吳醫馮元理

採藥吳中久匿名偶騎山虎下山行還丹賣畢還山去人說  
都門有宋清

茗溪歌

沙際交飛雙燕子池頭並宿兩鴛鴦採蓮人自愁相見況遇  
青衫白馬郎

黃佐三十一首

佐字才伯香山人正德辛巳進士選庶吉士授編修  
出爲江西按察僉事改廣西提學僉事致仕歸起左

春坊左司諫遷侍讀掌南院事再遷左諭德歷南祭  
酒進少詹事兼侍讀學士贈禮部侍郎諡文裕有泰

泉集六十卷

四庫總目佐詩吐屬冲和頗見研練於時茶陵之焰將  
熾北地之鋒方銳獨能力存古格可謂不失雅音  
藝苑厄言黃才伯詩如紫瑛石大似韎韐才伯亦有  
佳語如青山知我吏情澹明月照人歸夢長長空贈  
我以明月海內知心惟酒杯門前馬躍簫鼓動欄上  
雞啼天地開  
湧幢小品夏貴溪妾蘇廣陵人其父曰綱少女適曾  
石塘銑與貴溪爲聯衿綱出入兩家傳石塘復察之  
說夏大喜主其策綱益自負與巡倉御史艾朴通  
作奸爲眾所嫉分宜已一一刺其陰事伏毒深夏不  
悟妄度河套指日可復得意甚作漁家傲一闋適黃  
泰泉至振髯示之索和黃有千金不買陳平計之內  
蓋諷之也夏大詬詈喉言者逐之去去三日而禍作  
國雅黃詹事才伯性尚冲和韻含芳潤玄覽鯨洲藏  
珍瓊海爲一代名家其詩譬之龍躍懸河鳳鳴阿閣  
輝映高絕



廣東新語歐貞伯云秦泉先生嘯出南海持漢家三尺以號令魏晉六朝而指揮開元大厯變椎結爲章甫闢荒穢於炎微功不在陸賈終軍下列朝詩集才伯髫鬣以奇雋名及入翰苑博綜今古修詞揆藻爭雄藝苑嶺南人在詞垣者瓊臺香山後先相望後來梁公寶黎惟敬皆出才伯門下南越文學彬彬然比於中土矣才伯有漫興詩落句云倦遊卻憶少年事笑擁如花歌落梅自注云欲盡理還之喻王元美云此公作美官講學悲人得而持之故也今刻秦泉集不入此注故附記之明詩選陳臥子曰才伯亦窺見格律靜志居詩話文裕撰體願正而取材太陳故格雖聳高而氣少奔逸田拔才伯論詩云吾見近世古詩以綺靡爲精工律詩以粗豪爲氣格然則徐庾之玉臺優於蘇李之河梁蘇頌之輕花捧觴岑參之柳拂旗露反不如羅隱之天地同力韋莊之萬古坤靈矣持論甚精秦泉集古體微傷堆砌律體與七言斷句極得唐人格意

都門逢美人行姚倬坐席上賦送陳參政探韻得高舉

二字

都門柳絲青可縑開關好鳥求其曹美人久矣入夢寐笑揮  
結綠歌鳴皋憶昔贈我金錯刀欲往報之阻煙濤雲碁月珮  
忽相見冰雪一洗心煩勞瓦園開尊延旆旄春風淡蕩吹緋  
桃觥籌淩亂絲竹動燕笑不知明月高泉陵別駕醉起舞舞  
罷遠巡淚如雨感恩自是門下人殺身未報尊前主當年人  
棄君獨取英雄未遇多齟齬劍埋楚國終作龍璞售宋人何  
異鼠君不見毛公薛公誰當語風雨感會生毛羽平原之客  
徒豪舉

暮春郊外

五日逢休沐千山得勝遊樓臺蕭寺迴花竹習池幽春事已  
黃蜨舊盟惟白鷗煙塵奔走地回首意悠悠

次韻贈張子

長安木葉下蕭蕭生客愁夜寒空對酒雲淡獨登樓柳岸橫  
長笛花灘放小舟向來江海意淒斷爲清秋

秋日遊迎祥寺至玉泉分韻

迢遞尋蓮宇淹留詠桂枝玉驄穿柳入錦席傍泉移山翠浮  
龍苑雲光溢雁池塵心今已淨應有白鷗知

贈別韋評事歸靖江

抗疏甘南謫知君不負丞離情江上樹聚首驛前燈幽谷歌  
鳴鳥天池息大鵬扁舟汎明月回首夢毘陵

控海樓有懷徐可大

南州徐孺子落筆滿人間江上笑爲別天邊去不還高樓題

控海此日獨看山尙憶危言日投簪且閉關

粵臺懷古

勝地經秦漢高臺近斗牛片雲浮鬱水孤月滿靈洲事往市  
朝變秋來林壑幽霸圖何足問吾得采真遊

草堂夜坐

浪迹少城隈衡茅向水開閉門青嶂合卷幔白鷗來地僻清  
虛洞天高玄覽臺坐聞松籟起竟夕思悠哉

全節廟

極目煙塵暗帝畿樓船南去逐斜暉已無虎帳鳴金柝祇有  
龍潭葬寶衣精衛何時填海滿蒼梧終日見雲飛貞魂若化  
吳宮燕應是年年一度歸

桂江秋懷借養齋方伯韻奉寄

桂江水高三尺強秋來鴻雁相同翔鳴榔振柁亦何意楓葉  
蘆花俱可傷蒼梧望斷粵雲白滄浪歌罷湘煙長會須萬里  
去寥廓嗟爾周羅空自張

羅浮青霞谷贈甘泉

青霞谷中飄紫煙誰其栖者甘泉仙雲邊放鶴啄瑤草雨後  
呼龍耕玉田梅花不作翠羽夢薤葉細寫朱雲篇沖虛昨雨  
自高枕曉來同話羲皇年

補送孫學士之留都

景陽鐘動散宮鴉南院新承北闕麻潞清夢回燕樹月玉京  
吟對蔣陵花山分龍虎會開國江足鱸魚莫念家誰道桂坊

成久別伫看鳴珮入承華

彭城懷古

華髮蕭蕭羈旅情  
片帆衝雨過彭城  
黃樓此日河聲急  
赤帝當年劍氣橫  
魏闕自生千里草  
長陵誰薦一杯羹  
歌風臺下休回首  
惟有寒潮訴不平

聞雁

瀟湘水碧莓苔青  
白雁掠雲時一聲  
疏燈古屋照蓬鬢  
江湖心事秋冥冥

匡山懷古

兩厓形勝自天開  
奪港猶思卷土來  
千古海陵遺跡在  
雲濤回望重堪哀

讀見素救李空同奏疏偶成

賈誼憂時舊有名楚騷何事不勝情  
長安宿鷺衝人起應是風波到處生

潞河阻凍戲贈文衡山

闔閭城下浩煙波日日沙頭載酒過  
垂楊繫艇不知數一紙黃庭雙白鵝

南歸途中

南旺湖邊沙柳春鵝黃鳬藻相鮮  
新棹歌歌遍江南曲嫋嫋輕風吹白蘋

西清詞三首

璧月珠星滿紫壇蓮花齊簇切雲冠  
瑤池豈必傳青鳥蓬島

惟應集絳鸞

碧殿崢嶸概泰清  
飈臺時送步虛聲  
流鈴擲火飛章地  
一片雲遮翡翠城

滅卻雲鬟帶玉冠  
紫煙衣薄露光寒  
步虛聲裏琪花落  
贏得君王轉盼看

張時徹 二十六首

時徹字唯靜鄞人嘉靖癸未進士授南兵部主事改  
禮部歷員外郎中出爲江西提學副使歷福建參政  
雲南按察使山東河南布政使以僉都御史巡撫四  
川改江西入爲南刑部侍郎改兵部進尙書有芝園  
定集五十卷



明詩選陳臥子曰司馬樂府頗有造構近體宛倩麗逸如層臺佚女意帶雲霞

列朝詩集尚書詩學殖富有工力深重樂府古詩標舉與會時多創獲七言今體塵空蕪穢若出兩手楊

用修評其詩云四言以至六言冲澹穠粹沈鬱雄壯匠意鑄詞色具體備七言之什自鄧無譏用修可謂

能言矣

甬上耆舊集尚書歸老時尚茂齒精思著撰為詩古文詞及他說林家言凡數十卷輯洪建以來大家名

文為文範別為文苑撰郡誌續四明風雅既以標格自持益好士寵薦後輩凡經其門後俱為名士大夫

所執友義重死生始為進士時有騎馬來定交者曰王微子揚快士也子楊死為刻鶴山集豐人翁以落

魄死為刻考功集陳后岡早歿既刻其集復為勒石墓門家有別墅在東皋曰茂嶼草堂在西皋曰武陵

莊時引上客觴詠其間卽單門年少一經品目藉以揚聲吾鄉士大夫壇墀於斯極盛矣

靜志居詩話芝園樂府不規摹古人較之濟南覺勝五律頗近初唐

田拔芝園詩自以樂府為勝騁文亦是當家所作豐考功集序情文俱美視貌襲秦漢者不可以道里計

豔歌何嘗行 五解

天有七曜地有四維天有七曜不照汝情地有四維不能制

汝遊行

一解

結髮爲婚婦琴瑟兩相和汝今但遠去信誓齊

山河

二解

池中有鴛鴦箇箇兩相當樹上有女蘿葉葉自交

柯

三解

食蓼不言苦食鬱不言甘心思所親人過期而不殮

四解

醯雞處餅益蠹蟲食桃李不得同生亦得同死

五解

子夜歌 二首

乍來結女伴江頭去浣紗問訊郎消息夜來燈燭花

女郎宛轉歌輕舟棹碧波打動明珠碎團團落菱荷

古別離

春思已無那如何又早秋偏將一片葉飛作萬重愁鳳枕蘭

香細瑤階霜杵柔暗揮雙淚眼一望大刀頭

有所思

清鏡久不御朱鉛那復施忍看雲並雁愁見月穿帷華燈冷  
紅豔庭草委芳蕤不及梁間燕雙雙啄紫泥

戰城南

朝戰城南暮戰城北矢若飊飛戟如蜎積晨起裹創血淚沾  
臆營中振鈴帳下蓐食城南舉火城北揚旗將軍如虎偏裨  
如鴈衝堅陷瑕什攻五圓血流野草肉挂枯枝我聞有道四  
海履戈桑乾草青條支不波北歎呼韓南制尉佗魚麗雲屯  
被甲則那

關山月

東海冰輪出西川桂影多弓開玄菟郡鏡轉白狼河亂角驚  
城鵲清霜照鐵戈胡塵猶未滅戍客奈愁何

江南曲

四首

儂住大江南君家大江北生長不相知江頭見顏色  
月白鸞簫細江清龍笛鳴長千里中兒打鼓賽江靈  
捕魚橫塘濱船多不施罟南風忽來吹移舟向前浦  
東涯芳杜綠西渚蓮花紅瓊英若可贈徙棹及秋風

嬋娟曲

繆承金屋寵轉爲玉顏傷妾意有何極君恩自不常朝朝占  
鳳瑩夜夜夢朝陽不惜千金賦能蒙一盼光

寶刀吟

幽并遊狹兒百寶裝吳鉤處囊時電掣出匣有星流空抱屠  
龍技未逢推轂收何當承尺檄一爲掃旄頭

青山歌贈蕭封君

青山兮嵯峨綠水兮層波朱鳥兮上下玉樹兮交柯山有人  
兮考槃殫玉屑兮弄潺湲荷衣兮簪冠紉之兮紫蘭彼簪紱  
兮何有徒忍尤兮抑首瞻鳳羽兮高飛琴樹蕙兮盈畝歸來  
兮山中駕白鶴兮驂龍丹邱兮羽人聊與子兮從容

君房下第歸

在在有芳草處處有青山君去興之去君還與之還燕臺空  
駿骨漢宮擯朱顏自古有如此沈冥且閉關

離別詩

朝殮共盤匝夕夢貼衾帷肝膽自相照山河誓不違脂車臨  
遠道啟匣出裘衣甯知寸心斷還言千里歸

送林民服歸省

大夫懸紫旆相送出江東那忍仙舟去猶憐尊酒同山青建  
業雨雲白武夷宮繡服承歡處芳蘭滿故叢

龍隱潭

磴險愁窺壑巖開始見天衣裳牽宿霧石罅瀉鳴泉四壁松  
蘿古孤峰日月偏雲雷時不歇知有白龍眠

邵武道中

明發衝寒露征旄載曉星水穿雲竇白天掩石門青鳥雀爭  
陽谷松欒間短亭所嗟筋力薄奔走未遑甯

大王峰次中溪韻

不有風流客那知太上峰盤雲出鳥背拂石禮仙容鍾乳流  
丹壁巖花開紫茸夷猶終永日昏黑尙捫松

自清泉至衛源舟中作

飛鳧將畫舫只傍片雲行本以風波客因舒覽眺情煙凝村  
店近月上野鐘鳴一曲陽春調停琴待友生

新秋詠懷時在病

芳杜秋風冷蘭舟剡水遲美人在何許遠道本難期皓月臨  
瓊樹青樓出鳳吹曲中有深怨不奈妬蛾眉

訊東川閉關不出

入林何太密閉戶但窮玄流水在屋外青山落枕邊藥從三

島得方自上池傳勅斷人間世逍遙一睡仙

春日遊茂嶼山莊同諸彥作

蘭舟一出郭步步可憐春沙草不禁綠谿花亦自新煙霞青  
竹杖湖海白綸巾總爲疏狂甚豪吟不避人

雨望

高樓不可上一上一添愁落葉亂山暮滄江凍雨秋洩雲寒  
抱樹決水曲通洲白髮何爲蒼空餘一劍留

十四至茂嶼山莊

一自逃空谷長爲山水雄每逢青眼客來伴白頭翁煮茗燒  
松葉餠泉引澗虹瑤臺高不極徙倚睇秋空